

ጳውሎስ ቲቶሳስ ጸፊዱ ኪታ ጊዶ ቆፋ

ቲቶስ አይዛቤቴላፌ ሲሚ አማኖን ጌሊዲ ጳውሎስ፣ ሚሺራቾ ቃላ ኦሶን ማታን ማዲዛ ኢዛስ አዳ ኤሬቲዳ ላጌ። ጳውሎስ ሃይሳ ሃ ኪታዛ ጸፊዳይ ባፔ ላይላን ዮጊዛኔ ኢዛራ ማቲዛ ባናራ ኢሲፌ ኦሲዛ ቲቶሳስ ጊዲሺን ቲቶስ ሄ ዎዴ ዎሳ ኬላ ጸሊሼ ቃርጾሴ ጌቲቲዛሶን ዴስ፤ ሃ ኪታይ ሎኤሊ ሚንሊዛይ ሄዡ አይፌ ዮኦታ ቦላ።

ኮይሮይ ዎሳ ኬላ ጨማቲ ሃራፔካ ቃርጾሴ አሳስ ኢታ ኦሶ ጊሻስ ኢሰታስ አይ ማላ ሎኦ ኦሶይ ቤሲዛኮ ቲቶስ ኢሰታ ታማርሳና ማላ ቲቶሳ ቆፍሴስ። ናምኣንፊዛ ዎሳ ኬላ ጊዶን ዲዛ ዲማ ዲማ ቡቴን ሄሲካ ጨሚዳ ማጫሳታኔ አቱማ አሳ፤ ሄሳፊካ ናቴላ ናይታኔ አሳስ ኦሲ አቁዛይታ ኢዚ ታማርሳና ቤሲዛይሳ ታማርሳና ማላ ቲቶሳ ዘሬሰ። ወርሴላን ቃሴ አማኖን ዲሳ ጊሻስ ሃራፔካ አሳይ ሳርኒኔ ሲቆቴላን ዴኣና ማላሳ፤ ሄሳፊካ ዎሳ ኬላ ጊዶፌ ኢሶይ ኢሳ ኢጾ፣ ኦሺኔ ባ ጋርሳን ሻኬቴላ አጋና ማላ ቲቶሳስ ዘሬ ኢሚዲ ኦላና ኦጌ ቤሲዴስ።

ሃ ማጸፋይ ኦይኪዳ ኩሜላ ቆፋ

ጌሎሶ 1:1-4

ዎሳ ኬላ ካሌሊዛይታ 1:5-16

ዎሳ ኬላን ዲዛ ዲማ አሳታስ ኢሜቲዳ ኦሶ 2:1-15

ዘሬኔ ናጌታና ማላ ቆፊሶ 3:1-11

ኩሻ ቆፋ 3:12-15

ዎሳ ኬላ ካሌሊዛይታኔ ዎርዶ አስታማሬታ

1 ጸሳስ ዶሬቲዳይታ አማኖኒኔ ቱሙ አያናን ካሌሊዛ ቱማ ኤራቴላን ዲቻና ማላ ጸሳ አይሌኔ ዬሱስ ኪርሰቶሳ ሃዎሬ ጊዲዳ ጳውሎሳፔ።

2 ኢዛ አማኖይኔ ኤራቴላይ ካሴፔ ኦይኪዲ ዎርዶቶንታ ጎዳይ ዳር ዎዴፔ ካሴ ባ ኢሚዳ ሜርና ዴኦ ሂዶታ ማላ።

3 ኢዚ ካሴ ጊዳ ዎዴይ ጋኪዳ ማላ ኦና አሸዳ ጸሳ አዛዞን ታስ ሳባካናስ ኢሜቲዳ ሃራ ባጋራ ጸሲ ባ ቃላ ቆንጨሲዴስ።

4 ነሰ ኮሌ ጊዲዳ አማኖ ኢሲፌቴላን፤ አማኖን ታስ ቱሙ ና ጊዲዳ ቲቶሳስ፡ «ጸሳ አዋፔኔ ኑና አሺዳ ዬሱስ ኪርስቶሳፔ ኪያቴሌኔ ሳሮቴሌ ነስ ጊዶ» ጊዴስ።

ቃርጾሴን ቲቶሳ ኦሶ

5 ታ ኔና ቃርጾሴን አጊዳይ ቡሮፔ ጊጋና ቤሲዛ ዳሮ ሚሺ ዲዛ ጊሻስ ኔ ጊጊሳናሲኔ ታ ኔና አዛዚዳ ማላ ካታማይ ዲዛሶን ዋሳ ኬላ ጨማታ ኔ ዶራናሳ።

6 ጨማቴላን ዶሬታናይቲ ኢስታ ቦላ ዋሶይ ባይንዳይታ፤ ኢሲ ማቺ አዚናታ፤ ናይቲ አማኒዛይታኔ ዋዪሶንታይታ ዋይኮ አዛዜቲዛ ናይታ አዋታ ጊዴቶ።

7 ዋሳ ኬላ ጨማይ ጸሳስ ኦላና ሃዳራ ኤኪዳዴ ጊዲዳ ማላ ኢዛ ቦላ ዋሶይ ባይንዳይ ጊዳናስ ቤሴስ፤ ሄሲካ ጨቄቲዛዴ፤ ጉላ ሚሻን ዪሎቲዛዴኔ ማሶቲዛዴ፤ ኡሻንቻኔ ኢዛስ ቤሶንታ ኦጌራ ጎኣ ጊዲዳዝ ጎዲ ኤኪ ቢዛዴ ጊዳናስ ቤሴና።

8 ሄሳፌ ቦላራ ኢዚ ኢማሳ ሞኪዛዴ፤ ሎኦ ኦሶ ዶሲዛዴ፤ ባርካ ባና ሃሪዛዴ፤ ሱሬ ኣስ፤ ጸሎኔ ባስ ናጌቲዛዴ ጊዳናስ ቤሴስ።

9 ሃራ አሳታ ሎኦ ቲሚርቲን ሚንሌሊዛዴኔ ሄ ሎኦ ቲሚርቲዛ ኢጸዛይታ ሃንቃናስ ባ ታማርዳ ማላ ቃላን ሚኒዛዴ ጊዳናስ ቤሴስ።

10 ዋዪሲዛይቲኔ ዶናን ጸላ ባሌሊዛይቲ ዳሮቲ ዴቴስ፤ ሃራፔካ ሄይቲ ቃጸሬቲዳ አይሁዳ አሳታፔ አማኒዳ አሳታ ባጋታ።

11 ሄይታንታ ጮኡ ሂስቴላ ቤሴስ፤ ጋሶይካ ኢስቲ ቤሶንታ ኦጌራ ባስ ጎኣ ዴማናስ ቤሶንታ ቲሚርቲ ታማርሶን ኬላ አሳ ወርሲ ሞሮን ዴቴስ።

12 ኢስታ ናቤታፔ ኢሳዴይ ኢስታ ጊሻስ ሃሳይሹ፤ «ቃርጾሴ አሳይ ኡባ ዋዴ ዋርዳንቻታ፤ ኢታ ዶኣታ፤ ጋንጃማታኔ አዛላታ» ጊዴስ።

13 ሄ ማርካቴላይ ቱማ፤ ሄሳ ጊሻስ ኔ ኢስታ ሎኤላ ሃንቄታ፤ ጋሶይካ ኢስታስ ቱሙ አማኖይ ዳና ማላኔ።

14 አይሁዳታ ሃይሲኤ ዋይኮ ቱሙ ዮኦፔ ሃኪዳ አሳታ አዛዘ ኢስቲ ሲዮንታ ማላሳ።

15 ጌሻታስ ሚሺ ወሪካ ጌሻ ሺን ቱናታሲኔ አማኖንታይታስ ጊዲኮ ወሪካ ቱና፤ ሃራፔካ ኢስታ ቆፋይ ወሪካ ቱኒዴስ።

16 ኢስቲ ባና ኮኒ ጸስ ኤሮስ ጌቴስ ሺን ባ ሃኖቴላን ጊዲኮ ካዴቴስ፤ ኢስቲ ሃራሲዛይታ፥ አዛዜቶንታይታኔ ሎኦ ኦሶስ ቤሶንታይታ።

2

ቱሙ ቲሚርቲ

1 ኔኒ ጊዲኮ አሳ ቱሙ ጊዲዳዝ ታማርሳ።

2 ጨማ አሳይ ዋዚናማ፥ ቦንቹቲዳይታ፥ ባና ባርካ ሃሪዛይታ፥ አማኖኒኔ ሲቆን፥ ዳንዳያንካ ሎኦ ጊዳና ማላ ኔ ኢስታ ዘራ።

3 ሄሳሉካ ጨማ ማጫሳቲ ባ ዲዛ ዱሳን ቦንቹራ ዲዛይታኔ ሎኦ ሃኖቴላ አሳ ታማርሲዛይታ ጊዳቶ አቲን አሳ ሱንላ ኢሲዛይታ ዋይኮ ዋይኔ ጫጃ ኡሻ ሱኬን ዋጾቲዳይታ ጊዶንታ ማላ ኢስታ ታማርሳ።

4 ሄሳሉ ኦሊኮ ናቴላ ማጫሳቲ ባ አዚናታኔ ባ ናይታ ዶሳና ማላ ታማርሳናስ ዳንዳዬቴስ።

5 ጸሳ ቃላይ ኦና አቻንካ ጫዬቶንታ ማላ ኢስቲ ባርካ ባና ሃሪዛይታኔ ጌሻታ፥ ኬላ ጊዶን ኢስታ ኦሶይ ኦይኪዳይታኔ አሳስ ኪያታ፥ ባ አዚናታስ አዛዜቲዛይታ ጊዳና ማላ ጨማ ማጫሳቲ ኢስታ ታማርሴቶ።

6 ሄሳሉካ ዬላጋ አቱማሳይ ባርካ ባና ሃራና ማላ ኔ ኢስታ ዘራ።

7 አይ ሃኖንካ ኔ አሳስ ሎኦ ሌሚሶ ጊዳ፤ ኔኒ አሳ ታማርሲዛ ቲሚርቲዛ ኔኒካ ዋዚናፔ ታማርሲዛዴኔ ናጊዛዴ ጊዳ።

8 ኦ ጊሻስ ኢታ ሃሳይዛ አሳይ ሃሳያናስ ኢታ ዴሞንታ አጊዲ ዬላታና ማላ ኔ ሃሳይዛ ሃሳያ ጊዶን ቦርሶ ዮኦይ ዶፖ።

9 አይሌቲ አዛንካ ባ ጎዳታስ ሃሪታና ማላኔ ኡፋይሳና ማላ፤ ቃሴካ አጫቲ ዛርንታ ማላ ታማርሳ።

10 ሃኒዛዛን ኡባን ኦና አሺዳ ጸሳ ቲሚርቲይ ዶሴታና ማላ ኢስቲ ሎኦ ማርካቴላ ቤሳና ማላ ባ ጎዳታ ሚሽ ካይሶቶፔቶ።

11 አሳስ ኢዛፔ ማሮይ ቤቲዛ ጸሳ ኪያቴላ አሳ ኡባስ ቆንጨዴስ።

12 ሄ ኪያቴላካ ኮኒ ናጋራን ዱሲኔ ሃ አላሜ አሞቴላ ካዲዲ ሃይሳ ሃ ዋዴዛን ኦርካ ኦና ሃሪዲኔ ጸሎቴላን ቱሙ ኢያና ዱስ ዳናይሳ ኦና ታማርሴስ።

13 ሄሲካ ኦስ አንጃቲዳ ሂዶታ ጊዲዳ ዋጋ ጸሳኔ ኦና አሺዳ ዬሱስ ኪርስቶስ ቦንቹይ ቆንጫናይሳ ናጋናሳ።

14 ኢዚካ ኑና ኢታቴላፌ ዋዛናሲኔ ሎኦ ኦላናሰ ሚኒዛ ባ ዳሬ ባሰ ዶራናሰ ባና ኑሰ አሉ ኢሚዴሰ።

15 ሄሳ ጊሻሰ ኔ ታማርሳናይቲ ሄይታንታ፤ ሄሳካ ኔ ኩሜላ ጎዳቴላራ ዘራኔ ሃንቃ፤ ኔና ኦኒካ ሌቆፎ።

3

ሎኦ ኦሰ

1 አሳይ ዳሬ አይሲዛይታሰ ሃሬታና ማላኔ ሎኦ ጊዲዳ ሚሽ ወርሲ ኦላናሰ ጊጋ ጊዳና ማላ አሳ ቆፍሳ።

2 ቃሴካ ኦኒካ አሳ ቦላ ኢታ ሃሳዮንታ ማላኔ ሎኦ አሳ ጊዳና ማላ አሳ ኡባሰ ኩሜላ ዋዚናፔ ባ አሽኬቴላ ቤሳና ማላ ኡባ ቆፍሳ።

3 ኦኒካ ካሴ ቆፋይ ባይንዳይታ፣ አዛዜቶንታይታ፣ ባሌቲዛይታ፣ ዲማ ዲማ አሞኒኔ ሎኦ ዲሳሰ አይሌቴላን ሃሬቲዛይታ፤ አሳራኔ ኑርካ ኑ ጋርሳንካ ኦዩቲሼ ኢታቴላኒኔ ሚቃይኔቴላን ዶሰ።

4-5 ጊዶ አቲን ኑና አሺዳ ጾሳ ኪያቴላኔ ኢዛ ሲቆይ ቆንጩዳ ዋዴ ኑ አሉዳ ጸሎቴላን ጊዶንታ ዲሺን ኢዛ ማሮቴላ ዳሮን አቲዶሰ፤ ኢዚ ኑና አሺዳይ ናሞኦንሶ ዩሌቴላ ጊዲዳ ሜቻኒኔ ጸሎ አያናን ኦራጾቴላና።

6 ሄሳካ ጸሎ አያናይ ኑ ቦላ ኑ ጎዳ ጾሲ ኑና አሺዳ ዩሱሰ ኪርሰቶሳ ባጋራ ዳርሲ ጉሲዴሰ።

7 ሄሲካ ኑ ኢዛ ኪያቴላን ጸሊዲ ሜርና ዴኦ ሂዶታ ኦይኪዲ ላቲዛይታ ጊዳናሳ።

8 ሄሲካ አማኔቲዳ ቃላ፤ ጾሳ አማኒዛይቲ ሎኦ ኦሶሰ ባና አሉ አማና ማላ ሃይሳ ወርሳ ኔ ሎኤላ ዮታና ማላ ታ ኮያይሰ፤ ሄሲካ ሎኦኔ አይ አሲካ ኮይዛዛ።

9 ቃሴካ ሃዳ ፓላማፔኔ አሳይ ባ ቆሞ ቆዲዛዛፔ፣ ማርሼፌኔ ዋጋ ጊሻሰ ዴንዲዛ ኦሻፌ ኔ ሃካ፤ ሄይታንቲ ጎኦይ ባይንዳ ፓሶንታ ዮኦ።

10 አሳ ጊዶን ሻኬቴላ ሜጲዛ አሲ ኢሲቶ ናሞኡቶ ኔ ዞሪን ኤኮንታ ኢጲኮ ኢዛዴራ ኔሰ ኢሲፌቴላ ዶፖ።

11 ሄሳ ማላ አሲ ባሌቲዳ ናጋራንቻ አሳ፤ ኢዛዴይ ባርካ ባ ቦላ ፒርዲዳይሳ ኔ ኤራ።

ወርሴላ ዞሪ

¹² አርጺሞኔ ወይኮ ቲቂቆሳ ታ ኔኮ ኪቲኮ ኔ ታኮ ኒቆጸሊዮኔ ያናስ ኔስ ዳንዳዬቲዛዝ ወርሳ ኦላ፤ ታኒ ሃ ላይላ ባልጎ ሄን አላና ጋዳ ቃቻዲስ።

¹³ ወጋ ኤሪዛ ዜማሲኔ አጲሎሲ ቢሺን ኢስታስ ኮሺዛዝ ወርሳ ኩንላ ማዳ።

¹⁴ ኑ ባጋታስ ሃቺስ ሃቺስ ኢስታ ኮሺዛዝ ኢስቲ ዴማና ማላኔ ኢስታ ዴላይ ጎኣይ ባይንዳዝ ጊዶንታ ማላ ኢስቲ ሎኦ ኦሶ ኦሴ ሚናና ማላ ታማራናስ ኮሺስ።

¹⁵ ታናራ ዲዛይቲ አንቴና ሳሮ ጌቴስ፤ አማኖ ጋሶን ኑና ሲቂዛይታ ኡባ ሳሮ ጌቴ፤ ጾሳ ኪያቴሴ አንቴናራ ጊዶ።

ጌሻ ማጸፋ

Gamo: ጌሻ ማጸፋ Bible of Ethiopia, Ethiopic script

copyright © 2024 The Word for the World International

Language: Gamotso (Gamo)

Contributor: The Word for the World Northern Africa

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025

d0ee6825-f93e-584e-8c8f-567d8d068e4b